

四庫全書

史部

欽定四庫全書

史部

山西通志卷二十一

詳校官監察御史<sub>臣</sub>查善長

檢討<sub>臣</sub>德生覆勘

總校官進士<sub>臣</sub>朱鈐

校對官編修<sub>臣</sub>勵守謙

謄錄監生<sub>臣</sub>黃嵩齡

欽定四庫全書

山西通志卷二十一

山川五

大同府

大同縣

小白登山在縣東七里高一里盤踞三十五里上有白  
登臺東北連採掠山一名馬舖山服虔曰白登臺  
名去平城七里如淳曰平城旁之高地若丘陵也師

古曰在平城東山上去平城十餘里今其處猶存服說非也 李穆叔趙記平城東七里有土山高百餘尺方十餘里即白登也 後魏皇始元年二月建祖廟於白登歲一嘗兼祀天帝以山神為配 天興元年正月部署將帥以上陽侯奚斤為前軍將三萬騎陽平王熙等十二將各一萬騎講武白登親臨校閱四年二月以所獲高車衆起鹿苑於南臺之陰北距長城東包白登屬之西山廣輪數十里引武川水注

之苑中疏為二溝分流宮城又穿鴻雁池 太祖田  
於白登山見熊將數子顧謂冠軍于栗磾曰卿勇幹  
如此寧能搏之乎對曰天地之性人為貴若搏之不  
勝豈不虛斃一壯士自可驅致御前坐而致之尋皆  
擒獲 永興四年立昭成獻明太祖廟於白登西祠  
天神二十三左右立華陰公主廟於太祖廟垣後五  
年八月甲寅上臨白登觀降民數軍實 泰常四年  
九月築白登宮 太宗出遊於白登之東北內將軍

都將元幹以騎從有雙鷗飛鳴於上太宗命左右射  
莫能中幹自請射之以二箭下雙鷗太宗嘉之賜御  
馬弓矢金帶以旌其能軍中號射鷗都將 太和元  
年四月丁卯辛白登山四年四月辛巳辛白登山太  
祖廟魚祀吳天上帝以山神配旱則禱之多有效十  
六年十月詔曰白登廟者有為而興昭穆不次故太  
祖有三層之宇巴陵無方丈之室又嘗用季秋躬駕  
展虔今授衣之旦享祭明堂元冬之始奉蒸太廟若

復致齋白登便為一月再駕可令典神者攝行祭事  
高祖追思宜都丁公穆崇勲令著作郎韓顯宗與  
宗曾孫真撰定碑文建於白登山

牛皮嶺在縣東六十里高一里盤踞十里北連採掠山  
南連土坡山下有牛皮關

豐稔山在縣東百七十里高三里盤踞十里山有一峯  
四周土坡

遊越谷在縣南 後魏太和元年十月南部尚書鄧宗

慶奏民李飛王顯前詣京南山採藥到遊越谷南嶺  
下見青碧石柱數百枚長者一匹相接而上或方一  
尺二寸或方一尺方楞悉就請付作曹採用奏可時  
人神異之

鳳山在縣西南四十里遞高八里盤踞三十里西連土  
嶺南連口泉峪北連左雲界雲岡諸山山一峯

七峯山在縣西南四十五里懷仁界高八里盤踞三十  
餘里西南連禪房山北連口泉峪西連懷仁四老



溝山山有七峯曰筆峯曰太史峯曰劒峯曰鰲峯曰  
白雲峯曰摩天峯曰玉女峯七峯羅列摩天峯最高  
其脊有青石盤旋至巔遠視似龍壁有洞口名玉龍  
洞又有天橋東壁鑿石梯百級援鐵絙而上一名玉  
龍山

禪房山在縣西南六十里高七里盤踞四十里西連懷  
仁馬石嶺北連七峯山暨七峯山南之月窟嶺南連  
鵞毛山又連懷仁石井山一峯壁立土人名大人峯

上建孰浮圖佛寺胥遼建

雙山在縣西南百三十里

牛心山在縣西南百八十里

勝山在縣西南二百三十里

拖皮嶺在縣西十五里

武州山在縣西二十里高二里盤踞三十里北連雷公

山一峯下有泉即武州川水之源也峪中有石窟寺

魏孝文帝嘗幸焉 後魏高宗時僧曇曜請於城西

武州塞鑿山石壁開窟五所鑄建佛像各一高者七十尺次六十尺彫飾奇偉冠於一世 顯祖皇興元

年四月丁酉行幸武州山石窟寺四年十二月甲辰幸鹿野苑石窟寺 延興五年五月丁未幸武州山

太和四年八月戊申幸武州山石窟寺六年三月

辛巳幸武州山石窟寺賜貧老者衣服七年五月戊

寅朔幸武州山石窟寺 後魏景明初大長秋卿白

整準代京靈巖寺石窟為高祖文明太后營石窟二

所于伊闕山窟頂去地三百一十尺則武州峪之石窟其功費可知 明一統志山下有耿氏三冢金皇統間建塔上有誌云父曰光祿子曰銀青孫曰昭勇雙化嶺在縣西三十里高十里盤踞百餘里南連拖皮嶺北武周山南北二峯南峯尤高嶺西有古寺蹟相傳二僧化此 後魏天興中儀曹郎董謐獻服食仙經數十篇於是置仙人博士立仙坊煮鍊百藥封西山以供其薪蒸 青龍觀前有懸石絕頂少西有石

洞援鐵絙而上鐫詩曰不知通得天台否鐵索懸崖  
度石橋

高山在縣西八十里

雷公山在縣西北十五里高七里盤踞百二十里南連  
武周山北至邊牆上有雷公廟下有龍亭泉禱雨多  
應

丘家嶺在縣西北三十里

石碌山明一統志在府城西北五十里故平地縣東四

十里山出石碌

彌陀山在縣西北九十里乃拒牆堡之北山也 金志

宣寧有官山彌陀山石碌山

野狐嶺在縣北二十六里

神山在縣北四十里

紇真山在縣北五十里高三里盤踞十五里南連採掠

山北近邊牆 五朝志雲內有紇真山白登山武周

山有濕水 紇真猶漢言千里也山冬夏積雪一名

紇干唐昭宗曰紇干山頭凍死雀何不飛去生處樂  
方山在縣北五十里高三里盤踞四十里一峯壁立巔  
有拓跋魏二陵乃方山官址 水經注羊水又東注  
于如渾水亂流逕方嶺上有文明后陵陵之東北有  
高祖陵二陵之南有永固堂 後魏太和元年三月  
於方山太祖營壘之處建思遠寺嗣後頻幸方山三  
年六月辛未起文石室靈泉殿於方山五年四月己  
亥建永固石室於山上立碑於石室之庭又銘金冊

又起鑒元殿十三年四月丁亥幸靈泉池遂幸方山  
七月丙寅幸靈泉池與羣臣御龍舟賦詩而罷 按  
魏時幸方山亦頻幸靈泉池 初高祖於永固陵東  
北里餘豫營壽宮有終焉瞻望之志及遷洛陽乃自  
表瀍西以為山園而方山虛宮至後猶存號曰萬年  
堂 顯祖獵方山有兩狐起於御前詔奏事中散山  
強射之百步內二狐俱獲 高允年九十八被召在  
方山作頌志氣猶不多損談說舊事了無所遺 魏



太和中高祖賓禮舊老東平公畢衆敬與咸陽公高  
允引至方山雖文武奢儉好尚不同然亦甚相愛敬  
接膝款洽有若平生 高祖曾幸方山平原劉文亦  
大言於路側曰求見聖明申宣久居高祖引見尋勅  
酬叙 閹官王遇性巧彊於部分北都方山靈泉道  
俗居宇文明太后陵廟皆遇監作 宋使劉纘指方  
山曰此山去燕然遠近主客令李安世曰亦由石頭  
之於番禺耳

材山後魏天興二年七月築材山宮 天賜三年春正月甲申北巡材山宮校獵至屋孤山二月乙亥幸材山建五石亭三月庚子還宮四月庚申復幸材山宮占授著作郎王宜弟造兵法孤虛立成圖三百六十時遂登定襄角史山又幸馬城甲戌還宮八月甲辰幸材山宮遂至青牛山丙辰西登武要北原觀九十九泉造石亭遂之石漠九月甲戌朔幸漠南鹽池壬午至漠中觀天鹽池度漠北之吐鹽池癸巳南還長

川丙申臨觀長陂冬十月庚申還宮 天興五年蠕  
蠕社嶮聞太祖征姚興遂入參合陂南至豺山及善  
無北澤時遣常山王遵以萬騎追之不及 道武北  
狩豺山收定陵公和跋刑之路側後太武西巡五原  
回幸豺山校獵忽遇暴風雲霧四塞世祖怪而問之  
羣下僉言跋世居此土祠冢猶存其或者能致斯變  
上遣建興公古弼祭以三牲霧即除散後蒐狩之日  
每先祭之 大同紀豺山疑卽方山

按蠕蠕跡參合  
陂南至豺山是

必古雲附  
近山也

岐王山在縣北九十里山上有岐王墓又有鬪雞臺李  
克用嘗屯兵於此一名奚望山 金志大同有武周  
山方山奚望山紇真山

三寶山在縣北百七十里

焦山在縣北明大同卒北保焦山

採掠山在縣東北四十里盤踞二百四十里東連陽高  
雲門山西南連小白登山產良藥上有採掠大王廟

採掠觀支峯 金志白登有白登臺採掠山有明代  
藩諸墓 胡志大同有馬舖山橋頭山獨角岡齊家  
山七里山合河山亦藩諸墓

東塘山有唐段文昌墓

武周山隋志有紇真山白登山武周山 縣西二十里  
武周川水出焉 宋昇明元年五月魏主雩於武周  
山澍雨大洽 魏太宗初祈福於武周車輪二山及  
即位壇兆後因以為常祀歲一祭祀用牛帝皆親之

無常日

屋孤山魏天賜三年正月建五石亭校獵於屋孤山或曰即夏屋

祥古山遼乾亨四年八月遼主至雲州獵於祥古山壬子次焦山

青原岡後魏太和九年七月戊子幸魚池登青原岡無榆坡有元學士許子遜墓

桑乾河繇應州東北流入縣境新橋村經城南古冢坡

會如渾水東流經白登山南六稜山北古定橋徐疇  
村余家寨西冊田補村貴仁村大新莊東冊田亂石  
村晏頭村馬營兒南徐村入陽高縣南川界隸縣境  
凡百三十里 金志大同有御河如渾水桑乾河  
晉義熙十四年魏建嶽瀆祠於桑乾之陰祀用牲幣  
水磨河在東門外

三聖井在縣東百二十里沈家窰

柳港在城東南

十里河在縣西三十里源發塞外之菱角海繇古雲內城入殺虎口經右玉城西紅土堡祁河堡又經左雲雲陽堡三屯堡雲西堡高山城雲岡堡流入縣境青磁窯鋪經王家園村西東合河村至高家店合御河隸縣境凡六十里

石窯泉在縣西三十里石窯寺左 王達善詩一脈元從石罅來湛於秋鏡綠於苔

石窯寒泉在縣西三十五里石佛寺



白道泉在城北 綱目集覽白道在古雲中郡今大同  
府有白道泉即飲馬長城窟處

得勝河在縣北八十里東入御河

如渾水在縣東北八十里源出塞外之葫蘆海繇陽高  
開山口兩源合流入縣境得勝堡經榆澗村至弘賜  
堡東南流經孤店村會得勝河又經馬站村白馬城  
至縣東門外興雲橋折而南流又經郝家莊沙嶺子  
村寺兒村鋪南北獨覺寺至高家店會十里河入桑

乾河隸縣境凡百四十里 水經注濕水又東逕班氏縣南如渾水注之水出涼城旋鴻縣西南五十餘里東流經故城南北俗謂之獨谷孤城水亦即名焉東合旋鴻池水水出旋鴻縣東山下水即成池北引魚水水出魚谿南流注池池水吐納川流以成巨沼東西二里南北四里今多涸 北對涼州地之南池池方五十里俗名乞伏袁池雖隔越山阜鳥道不遠雲霞之間常有西南流逕旋鴻縣南又合如渾水是

總二水之名矣如渾水又東南流逕水固縣縣以太和中因山堂之目以氏縣也右會羊水水出平城縣之西苑外武周塞北出東轉逕燕昌城南按燕書慕容垂輦過平城北四十里疾篤築燕昌城而還即此城也故北俗謂之老公城也羊水又東注如渾水亂流逕方嶺上有文明后陵陵之東北高祖陵也羊水又東注如渾水又南至靈泉池枝津東南注池池東西百步南北二百步池渚舊名白楊泉泉上出白

楊樹因以名焉其猶長楊五柞之流稱矣南面舊京  
北背方嶺左右山源亭觀繡峙方湖反景若三山之  
倒水下如渾水又南分為二水一水西出南屈入北  
苑中又逕平城西郭內又南屈逕平城縣故城南史  
記曰高帝先至平城史記音義曰在雁門即此縣矣  
王莽之平順也魏天興二年遷都於此如渾水又南  
與武周川水會又南流逕班氏縣故城東王莽之班  
副也闕駟十三州志曰班氏縣在郡西南百里北俗

謂之去留城也如渾水又東南流注於濕水

今如渾水枝津

暨泉池大概洄塞錄之以見拓跋魏建都之時其水道通行如此

金志大同有御河

如渾水 明一統志上有石橋下有金大定中所立

### 邊元忠碑

武州川出武州山西白羊山溪谷中引為石渠流經城南十五里東南合如渾水又名合河水經注武州川水出縣西南山下二源翼導俱發一山東北流合成一川北流逕武周縣故城西王莽之桓周也又東

北右合黃山水水西出黃阜下重北流聖山之水注  
焉水出西山東流注於黃水又東注武州川又東歷  
故亭北右合火山山西谿水水導源火山西北流山上  
有火井南北六十七步廣減尺許源深不見底炎勢  
上升常若微雷發響以草爨之則烟騰火發東五六  
尺又有湯井廣輪與火井相狀勢熱又同以草內之  
則不然皆霑濡露結故俗以湯井為目井東有文井  
祠以時祀祭焉井北百餘步有東西谷廣十許步南

岸下有風穴厥大容人其深不測而穴中肅肅常有  
微風雖三伏盛暑猶須裘寒吹凌人不可暫停其水  
又東北流注武周川水武周川水又東南流又東轉  
逕靈巖南鑿石開山因崖結構其容巨壯世法所締  
山堂水殿烟寺相望林淵錦鏡綴目新眺川水又東  
南流出山魏土地記曰平城宮西三十里武周塞口  
者也自山口枝渠東出入苑一水自枝渠南流東南  
出火山水注之水發火山東谿東北流出山山有石

炭火之熱間樵炭也又東注武周川逕平城縣東南  
流注如渾水 魏太和八年六月戊辰武周水泛濫  
壞民居舍

延水晉義熙四年正月魏主至延水遂幸豺山宮  
九十九泉

懷仁縣

蘆子山在縣西南十五里蘆子口村舊有鐵冶

小峪山在縣西南二十里小峪口村上有張萬戶洞最



峻山險

鵝鵝峪在縣西南三十里

牙余山紅山峪在縣西南三十五里中有捨身崖 薛  
家莊河通紅山峪

大峪山在縣西南五十里大峪口村盤曲二里連左雲  
縣四峯山上有鵬窠寺山礮昔有鵬窠今尚存

金仙山在縣西南五十里王平村接山陰界上有洞  
燕家山在縣西南六十里要寨村上有燕家洞石鑱燕

洞賓重修五字

滴水崖在縣西南六十五里金仙洞南石壁有孔日滴水數壺可供一人

金龍山在縣西南七十里山下有泉通馬邑金龍池

清涼山在縣西十五里悟道村高二里巔有磚浮圖數百里外可望見下有利國鐵冶北壁有石礮礮內有金鑽約三寸許觸之輒動取之不出石堂內有地鼓石擊之聲似鼓西有寒泉雖盛暑人不敢飲下有文

殊院明一統志山有軌塔及利國鐵冶

石井山在縣西十五里峪有石井

錦屏山在縣西二十五里山峯聳翠 金志懷仁有黃

花嶺錦屏山清涼山金龍山 明一統志舊有磁窑

鐵冶

鷺毛口山在縣西北十五里

得勝山在縣西北二十里山脊崎嶇鑿石梯數里攀援而上



金華縣志 卷二十一  
陳家峪山在縣西北二十里土人傳楊業敗處

團山在縣西北二十五里

玉龍山在縣西北四十里北連大同坤雲山山有七峯  
其峪青石盤旋至巔似龍形壁有玉龍洞洞口風聲  
迅疾深杳莫測援鐵絙躋洞上山巖竦出中建恒嶽  
行宮風雨不侵東壁石鑿百梯躋巔又東三里有黃  
龍洞

灰泉在縣東二十五里脉通黑河邊外燒荒草灰自泉

湧出元大德乙巳夏有聲如雷懷仁地裂二所湧黑  
水漂出松柏朽木即此泉也

鎮子海在縣東南十五里高鎮子堡海周四十五里產  
鯉魚重至數十觔水禽蕃育後居民決水渠導流於  
桑乾河水涸水經注桑乾枝水又東流津委浪通  
結兩湖東湖西浦淵潭相接水至清深晨鳬夕雁泛  
濫其上黛甲素鱗潛躍其下俯仰池潭意深魚鳥所  
寡惟良木耳俗謂之南池池北對涇陶縣之故城南

故曰南池也池水又東北注桑乾水以地形推之當  
係鎮子海

聖水泉在縣東南二十里海子村北明志海子西北有  
泉深不可測禱雨輒應

南沙河在南郭外昔無水明季始出泉  
五里河在縣南五里水東流旱則涸

泥河在縣南十里有涓泉南流河多淤泥

水磨河在縣南十五里溝多廻曲

宋家莊河在縣南二十里通紅山峪口水東流

鴛鴦河在縣南二十五里二水交匯

小峪河在縣南二十五里通小峪口水多流沙

薛家莊河在縣南三十里通紅山峪口水東流

大峪河在縣南四十里通大峪口水東流又東至大同

縣鄭家莊入桑乾河

南河在縣南五十里

新莊子河在縣南七十里發源新莊村西南經黃花嶺

雙井在縣南九十里相傳地倏湧二泉

上石井在縣西南百里

下石井在縣西南百二十里

北沙河在北郭外昔無水明季始出泉

按南北沙河舊志所謂沙泉也

三里河在縣北三里

里八莊河在縣北二十里

神泉在縣北四十里泉二眼水甚清甘

莎泉明一統志在懷仁縣後魏嘗以此名縣



山陰縣

青嶺在縣東南

香山在縣南三十里三峯齊列山下有沙家寺水冲碣  
出得遼沙彥恂墓焉

龍門在縣南三十里一名隘門上有魏文成帝射御臺  
碑陰刻從臣姓名

佛宿山在縣南三十五里一名覆宿山高入漢表雲生  
其上則雨名草梁山山東有磨笄石土人山下出水

名何家泉 金王拱碑文殊大師經行留宿處 明  
王文端家屏建復宿山房

余暗谷在縣南 宋宣和七年二月党項小斛祿迎遼  
主延禧遼主趨党項又為金兵所襲遂走應州至余  
暗谷金羅索執之以歸

余都峪在縣南 宋宣和六年遼主與金戰於奄遏下  
水海師潰走山陰居此

化悲巖在縣西南四十里 王濬初化悲巖記恒西諸山

惟書崖夏屋復宿最勝去復宿十餘里為化悲巖兩  
峯嵯峨壁立千仞東巖有石窟深廣可避風雨中建  
北嶽祠中雷聖水滴日盈缶以禱雨奇驗相傳有樵  
夫初夏采薪至巖窟見二仙對奕奕罷東坐指西坐  
者阿翁乃恒山神避朝嶽香火憩此共手談耳樵夫  
急下拜倏不見留薪窟中識之歸告諸父老遂伐石  
斲木構祠四楹

樺皮巖在縣西南四十里石罅滴水

黃花嶺在縣北四十里懷仁新莊村河南流繞其下古  
名黃瓜阜 齊天保五年四月柔然寇肆州時齊文  
宣自晉陽討之至恒州黃瓜堆菴羅辰兵已遁大軍  
遂還文宣以麾下數百餘騎為殿遇柔然別部數萬  
叩鞍而進四面圍逼齊主安寢平明方起神色自若  
指揮形勢彼衆披靡遂縱兵潰圍而出敵退走復追  
擊之伏尸二十五里獲菴羅辰妻子及生口三萬餘

魏勅勒部斛律金統所部萬戶詣雲州與兄平稍引

南出黃瓜堆為杜路周所破部衆分散 唐嗣聖四年八月突厥寇朔州總管黑齒常之與戰黃花堆寇敗追奔百餘里 元大德四年以黃花嶺土沃發軍民九千餘屯其地

大于口在黃花嶺西

金仙洞在黃花嶺內

米家嶺在黃花嶺南

桑乾河源出馬邑流入縣境河陽堡南安銀子安居坊

新舊岱岳諸村東流經城北又南經安昌寺麻家疇  
東湖嶺至曹娘子南入應州界水經注桑乾水又  
東左合武周山水水出故城東南流出山逕日沒城

縣北四十五里  
俗名黃昏城

南蓋夕陽西頽戎車所薄之故城也

東有日中城城東又有早起城

俗名雞  
鳴城

亦曰食時城

在黃瓜阜北曲中其水又東流右注桑乾水桑乾水

又東南逕黃瓜阜曲西又屈逕其堆南

即後小  
北塔

徐廣

曰猗盧廢嫡子曰利孫於黃瓜堆者也金志山陰

有黃花嶺桑乾河後魏天賜三年六月校獵豺山

遂至南平城

即新平城

規度灋南欲於黃花堆之陽面夏

屋建新邑乃發八部五百里內男丁於其地築灋南

宮門闕高十餘丈外城方二十里引溝穿地廣闢苑

囿後魏太宗嘗獵於灋南乘冰而濟冰陷沒馬王

洛兒投水奉太宗出岸水沒洛兒殆將凍死太宗解

衣以賜之龍灣諸峪流經應州西北七里入桑乾

河澇則泛旱則涸

西伯渠水在縣南八里巡撫黎陽王越開渠東注白泥河以殺復宿山諸峪水漲之害

黃水河源出朔州三泉流經辛村元英寢散亂復聚於黑圪塔經縣南匯流桑乾明萬厯後自上河西奔潰北徙迫城西址知縣劉以守改歸南行經流三門寒潭在縣南三十里潭形似甕蓄水成泓深不可測神泉在縣西北四十里一名沙家泉一泉三眼

白泥河源出榆林峪匯桑乾



沙家泉明一統志在山陰縣

應州

龍首山在州東北三十里延袤千里北山之南跨雲中  
此為山首明一統志雁門龍首相應故州以應名兩  
鎮三關志廣靈之六稜山源於龍首吳伯輿評畧蔚  
州北八十里襄山西接應州宋趙興時賓退錄朱  
文公嘗與客談世俗風水之說因曰冀州好一風水  
雲中諸山來龍也岱嶽者青龍也華山白虎也嵩山

案也淮南諸山案外山也

趙霸岡在州東二十五里南北橫卧右脇下即渾河

翠微山在州東南三十里東起北嶽恒山之右龍首山

西迤翠微峯茹越峯龍灣山香峯護駕岡西南聯勾

注山蜿蜒環疊袤二百里有奇橫列州南似翠屏高

不可用勾股海島法量胥稱南山山下水分流東北

入渾河西北入桑乾河

牛槽峪在州東南三十里

大石峪 小石峪胥在州東南三十里大小石峪水胥自南山流至州西舊城外合入桑乾河有洌靜山房在溝東坡上唐田游巖嘗棲此名大覺精舍

北樓口在州東南四十里

康峪口 徐峪口胥在州東南五十里

護駕岡在州南三十里相傳魏孝文帝駐蹕於此

雲山在州南四十里山峯日有雲籠之

茹越山在州南四十里繁峙縣界東有龍王堂又東有

白蟒神祠東北溝上有避靜坡山壁立如屏

書堂巖在茹越山內龍灣山西金進士曹之謙講學巖  
下故名

小山門口在州南四十里朱弁應州記南山之麓平坡  
峻坂林木深秀

峙峪口在州南四十里

龍灣峪在州西南四十里西南為茹越嶺一名南山山  
勢周環嵯峨灣曲上有龍池禱雨多應

香峯山在州西南四十里茹越口龍灣之南上有香峯  
寺暨石甃井

狼峪口在州西南四十里

馬蘭峪口在州西四十七里

水峪口在州西南四十七里通代州南山大小十餘口

東安峪在州西南五十五里東南為香峯山

西安峪在州西南六十里

胡峪口在州西南六十里西南有馬胡山

雁門山在城西南南山之北與龍首山相望 後漢志  
注陰館史記曰漢蘇意軍勾注應劭曰山險名也在  
縣爾雅八陵西隃雁門是也郭璞曰即雁門山山海  
經曰雁門山者雁飛出於其間

黃花岡在州西四十里山陰縣北四十里 金志金城  
有黃瓜堆復宿山桑乾河渾河崞川水黃花城崗旁  
有金仙洞懸石如樓殿 秋日花耀金光張翰詩黃  
花如散金李白詩張翰黃花句風流五百年可為是

山賦矣

南山在州西四十里接山陰界

邊耀山在州東北祝志在西北三十里形類蠓蚌山東  
隸渾源州山南隸應州山西北隸大同縣盤迴二百  
里有奇山下水流入渾河

桑乾河在州西二十里源出馬邑洪濤山合金龍池水  
繇馬邑山陰南東流經州西境涼亭村賈家寨曹娘  
子村白塘子村劉霍莊鄭家莊凡二十里有奇東合

渾河又北入懷仁縣界河不受橋亦不受舫怒漲則奪橋而去縮流又淺不可方舟 魏太祖伐中山南安公順守平城賀力劾等聚衆於陰館順討之不克乃從留宮自白登南入繁峙故城阻湍水為固以寧人心太祖善之 魏定陵公和跋謂弟毗曰湍北地瘠可居水南就耕良田廣為產業 魏中山仇洛齊乘驢赴京盧魯元候知將至結從者百餘騎迎於桑乾河見而下拜從者亦同致敬是後魏朝貴送迎以



桑乾河為限也 後魏太和十五年八月戊戌移道壇於桑乾之陰改曰崇虛寺

渾河在州東二十里源出渾源州西北流入州東北境遼邊耀山經東小寨北馬莊南柳會諸村凡六十里有奇北流入大同縣境西安堡入桑乾河

唐泉在州東二十里安邊鎮泉自石澗出以唐鑑墓其地故名冬夏恒流入渾河

聖水泉在州東三十里平地湧出

小石峪水在州東南三十里源出州南雲峯護駕岡諸山旱則涸澇則溢繇城南五里過城西北入桑乾

大石峪水在小石峪北二里源出州東南茹越龍灣諸山旱則涸澇則溢繇城東門遶流城北西北入桑乾國朝康熙二十四年以水侵城址築堤下社村逼水北流入渾河

馬跑泉在州南四十里朗嶺關下相傳李存孝飲馬於此

金鳳井在舊城內東北隅舊志相傳晉王李克用生時有金鳳飛入井也後唐明宗應州人後謚為李克用耳

龍池在龍灣山

渾源州

北嶽恒山在城南二十里高十里周百三十里北連玉華峯東連柏山南連鎗峯嶺山脉繇陰山南入朔平大同府境繇朔州西折而東為句注覆宿夏屋茹

越書厓突起于州南為恒山繇恒山南行為太行王屋西南盡于河東行為紫荊居庸而東北盡於海山巔建北嶽廟有十八景漢後祠曲陽

國朝順治十七年始祠北嶽於州 舜典至于北岳

禹貢太行恒山 周禮正北曰并州其山鎮曰恒山

爾雅恒山為北嶽 管子恒山北臨代南俯趙東

接河漢之間 周禮注在上曲陽漢祠常山於上曲

陽師古曰上曲陽常山郡之縣也 風俗通恒常也

萬物伏北方有常也 白虎通北方陰終陽始其道

常久故曰常山 漢志上曲陽恒山北谷在西北有

祠并州山禹貢恒水所出東入滹沱曰常山亭

應劭曰滹

音彊元和志漢改恒山為常山至周武平齊復曰恒山

唐志元和十五年更恒岳曰鎮岳 洞天記第五

洞北嶽鎮山周迴百三十里名總元之天在鎮州

福地記恒山周圍百三十里恒水出恒山北谷合於

滹入易又云恒山高三千三百丈上方二十里 名

山記恒山高三千九百丈七尺上方三十里周迴三千里尚書大傳謂之弘山漢諱孝文帝名改常山唐元和中名鎮岳宋諱貞宗名亦名常山水經注謂之元岳又名陰岳紫岳葛洪枕中書謂之太恒山亦稱恒宗命岳茂丘括地志北岳有五別名蘭臺府列女宮華陽臺紫臺太乙宮釋家謂之青峯埭道家謂之總元洞天太乙洞天金城福地山一名大茂山又名神尖山自州南十餘里入磁峽又五里至岳

廟山門又十里涉巔 晉葛洪枕中書顓頊氏為黑

帝治太恒山

巔名天峯嶺

最高

下建北嶽觀觀側有

飛石窟上建后土祠鎮之觀前風似虎吼名虎風口

去望仙亭三里路彌陡

峻上接巉巖下臨絕壑

得一菴在虎風口上觀東南

五十里有潛龍泉

在烟霞亭東泉二一甘

福地記恒

山有太元云泉上建龍泉觀觀之東有夕陽巖

在琴棋臺

東日入嶠

巖獨明

巖下有通元谷

張果賜號通元先生隱此

巖東面有碧

峯嶂

在琴臺東

東南有果老嶺

在氣毬場有驢蹄跡

嶺

下有白虎峯

在會仙府東  
巋然躡峙

觀之北峯頂百餘步有琴

棋臺

一峯突出峯秒少阜石几鑿棋局下視諸山如  
攢戟覆敦昔有雙白鶴化為二神女舞于臺

上已而拊落霞之琴歌清  
吳春波之曲遍山俱響

會仙府在琴棋臺下

即聚  
仙臺

又東北有白雲堂

在會仙府  
東中有洞

初入山有道名步雲路

在山門東  
北三里

行數里有翠雪亭

亭下為自在林萬松  
攢植林一名快活林上

亭坡名望仙嶺

嶺上有望仙亭  
去步雲路二里

東半崖有集仙洞

在會

仙府

東北有紫芝峪

在得一卷西  
芝記嘉靖三十五年夏六月上

明朱莒採取元

用北岳元芝維時正定守臣求于曲陽縣恒山不獲  
乃上言古北岳在山西大同府渾源州請下彼處求



之於是九月晦守臣登岳廟齋宿十月朔祭告令遍  
索之果得真芝十二本狀如雲錦其勅文在曲陽廟

西南有石脂圖

在岳廟西石阪作五色紋類雲母彈丸明珠贐者可作散

又有總

真洞龍湫滌井還元洞

明總督鄭洛記山故有洞洞蔽以神祠若特塞焉侍御黃

公撤而啟之題其額曰復還天巧予名之曰還元洞

白龍洞

在太尉祠上雲縷為雨徵

懸空

寺

在山門北二里磁硤西崖上壁立如削鐵空中竅石結構層樓

嶽廟創自元魏太

武帝太延元年宣武帝景明元年災唐武德間復建

唐末圯金復建天會大定間重修金末燬於兵元復

建元末燬明洪武中都指揮周立復建成弘間知州

關宗董錫重修弘治十四年勅擴修都御史劉宇以古廟陝度地中峯之陽建朝殿改古廟為寢宮古廟在山巔邃若雷中空若窟兩翼山削如壁去殿五丈許左翼自前折而右如障不接右翼者裁丈許如箭筈爰建門焉門內建小廡廡前二丈為殿臺臺陘不克容陞然結構窈窕殊類化工寢宮奉嶽神暨配小廡暨門祀康太尉朝殿去宮一里后土夫人廟在寢宮右飛石窟前唐志元和十五年恒陽縣更名

曲陽又更恒嶽曰鎮岳岳有岳祠此即明曲陽岳廟  
之始附記 尚書大傳維元祀巡守岳壇四奧沉四  
海封十有二山肇十有二州樂正定樂名冬祀幽都  
弘山貢兩伯之樂焉北岳冬伯之樂舞齊落其歌聲  
比小謠名曰縵縵和伯之樂舞其歌聲比中謠 秦  
祠官所常奉名山十二其二曰恒山 漢天漢三年  
春三月幸北地泰山修封還過祠恒山瘞玄玉 神  
爵元年祠北岳恒山於上曲陽一禱而三祠祠上曲

陽始此 後漢元和三年春二月章帝北巡至中山  
遣使以太牢祠北岳於上曲陽見黃白氣有神魚躍  
出 後魏泰常三年四月辛代至雁門關望祀恒岳  
建岳瀆祠於湟陰祀用牲幣此即今渾源州之北嶽  
也 四年正月南巡恒岳祀以太牢秋八月東巡遣  
使祀恒山 延和三年春正月至代祠恒山 太延  
元年春祠恒山建祠山上置侍祠九十人祠用牲牢  
玉帛 魏書十二月癸卯遣使者以太牢祀北岳

太平真君四年二月丙子車駕至於恒山之陽詔有司刊石勒銘十一年冬十一月南征還恒山祠以太牢和平元年春正月如中山過恒岳禮其神而返二年南巡過石門遣使者用玉璧牲牢禮恒岳

太和十八年親為文遣使祭恒岳薦牲玉景明元年二月恒山祠災隋大業三年有事于恒岳四年秋八月巡河北親祠恒岳西域吐谷渾十餘國咸來助祭隋大業中上幸晉陽因祭恒岳其禮頗采

高祖拜岱宗儀增置二壇命道士女官數十人於壇中設醮唐貞觀十九年親為文以太牢祭北岳於上曲陽一說貞觀間有石飛墮於曲陽因建祠自是祭岳於曲陽祠開元元年封北岳為安天王唐六典立冬日祭北岳於定州北鎮封始此張嘉貞撰碣在曲陽通考天寶五載偕中天王司天王同封七載封北岳神為安天王碑辭李荃撰其陰則康傑文書以八分者戴千齡也宋乾德六年後望祭北

岳於定州北岳祠 大中祥符四年冬十月加封安  
天元聖帝后加號靖明后真宗嘗撰碑記 政和三  
年詔嶽鎮海瀆年別一祭北嶽常山及遙祀北鎮醫  
巫閭山於定州界設位南向以西為上山川從祀西  
向以北為上 紹興七年詔以立冬日祭北岳望元祭  
至元五年加號安天大貞元聖帝 明洪武三年夏  
六月詔更北岳稱恒山之神 弘治十五年兵部尚  
書馬文升疏請釐正祀典改北嶽祭於恒山禮部尚

書倪岳履議曲陽廟祀已久當仍舊山在渾源者修治其廟詔從之 明代即位祭告兵孔祈禱胥有祭章碑碣在曲陽廟飛石殿左右碑樓內

國朝

聖祖仁皇帝御書化垂悠久匾敬懸殿內 東頂大茂山碑舜皇巡狩詣此山谷正擬登祀值大雪弗能進而遙祀之俄有石飛墜帝前遂以安王石名五載復狩其石載飛曲陽帝命即其地祠祀焉其飛窟尺寸



固安王石符券也

閭鉦飛石窟記飛石有窟在廟右鉦遣人至曲陽量彼石長九尺濶

四尺厚一尺二寸與此石廣狹不少爽差鉦題飛石窩三字

曲陽舊志曲陽恒山

在縣西北一百四十里即阜平之大茂山也自渾源

州發脉繇蜚狐嶺達曲陽水經注上曲陽長星水

亂流東逕恒山下廟北漢末喪亂山道不通此舊有

下階神殿中世以來歲書法族焉晉魏改有東西二

廟廟前有碑闕壇塲相列焉其水東逕上曲陽縣故

城北本岳牧朝宿之邑也古者天子巡狩常以歲十

一月至於北岳侯伯皆有湯沐邑以自齋潔周昭王  
南征不還巡狩禮廢邑郭仍存秦罷井田因以立縣  
縣在山曲之陽是曰曲陽有下故此為上矣王莽之  
常山亭也 上曲陽廟為恒山下廟非恒山上廟也  
舊有下階神殿是漢神爵後祀上曲陽之殿也漢末  
喪亂山道不通是指漢靈獻後雲代人民流散魏武  
不得已而立新興郡也 金大定七年或言前代都  
長安及汴洛以太華等山列為五岳今既都燕當別

議五岳名寺僚取崧高疏周都豐鎬以吳岳為西岳  
太常卿范拱以為非是議畧曰軒轅居上谷在恒山  
之西舜居蒲坂在華山之北以此言之未嘗據所都  
而改岳祀也後遂不改按拱言上谷在恒山西是以  
曲陽祠址為恒山也然恒山定祀上曲陽當在漢末  
時定祀曲陽當在唐元和時金趙秉文謁北嶽詩卜  
地恒陽曲移祠泰始元注謂晉移祠曲陽今北嶽志  
暨尹耕三曲陽考胥不甚詳數而志引韓魏公重

修廟記曰考有唐以來記刻皆不載廢遷之由爰為  
補之若安王石說其誣幻正無庸辨 韓琦岳廟碑

恒山一名大茂山也 大茂山在唐縣西北百五十

里山勢龍嵒登其巔俯視河北雲中諸山羅列兒孫  
山陰冰雪盛夏不消黃帝問道大茂山即此 北都

賦云茂山恒嶽之別名 大茂山在阜平縣東北七

十里接曲陽界乃恒山之脊土人名神兴石石晉與

遼分界地也阜平曲陽唐縣皆緣大茂之麓 恒

山在曲陽縣西北百四十里即舊阜平之大茂山也  
自渾源州發脉繇飛狐嶺達曲陽 寰宇記云一峯  
自渾源州恒山飛來故名 輿地覽山有太元之泉  
神草一十九種服之可以度世 沈存中筆談北岳  
謂之大茂山岳祠舊在山下祠中多唐人故碑晉王  
季存最滅燕還過定州與王處直謁岳廟是也石晉  
之後稍遷近裏今其地謂之神棚新祠之北有望岳  
亭新晴氣清則望見大茂山 渾源州恒山距阜平

縣大茂山三百餘里峯巒相接蓋恒山周三千里渾源南二十里與在曲陽西北百四十里者實一山也五岳真形圖北嶽恒山在大同府渾源州天涯崆洞二山為副岳神姓晨諱謨宋封安天元聖帝明改為北岳恒山之神主世界江河淮海兼四足負荷之類抱朴子凡修道之棲隱山谷須得五岳真形圖佩之則鬼魅虫虎一切妖毒皆莫能近後魏太祖還代京次於恒嶺親登山頂撫慰新民適遇黃門侍

郎崔元伯扶老母登嶺太祖嘉之賜以牛米因詔諸  
從人不能自進者給以車牛魏京兆王子推子恒  
字景安涉獵書史以春秋之義為名不以山川表求  
改名之後歷侍中謚宣正定人楊洪裕少時嘗漁  
於貂裘陂忽有馳騎至者以二石雁授洪裕一翼掩  
左一翼掩右曰吾北嶽使者也言訖忽不見是年生  
後周太祖楊淑妃明年生太尉廷璋家遂昌盛

翠屏山在州南七里高二里盤踞四里秀麗似翠屏南

連玉華峯山涇水所源也一名高氏山一名石銘陁  
金劉撝元蘓保衡胥讀書於此水經涇水出代郡  
靈丘縣高氏山水經注山上有石銘題言冀州北  
界故世謂之石銘陁也渾源州舊志翠屏山高千  
餘丈周十里即高氏之別名東南接靈丘界

龍山一名封龍山在州西南四十里高三里遶高二十  
里盤踞八里有文殊巖巖巔有萱草坡夏日雨過山氣  
如虹東北五里有玉泉山其東連柏山山之東北有惠



嶺秀麗可愛又名秀麗嶺下有黑龍池雲氣上升不  
三日而雨其東有五峯山上有三陽洞蟠踞又數十  
里 陳方澤神州之神隸山西者太岳鎮龍門山壺  
口山雷首山底柱山析城山王屋山梁山恒岳陰山  
白登山太行山河水西海桑乾水呼沱水衛水洹水  
而封龍山亦在列焉 龍允漢書注即龍山有四穴  
四時出風者 元初李治元好問張德輝嘗遊山時  
號龍山三老 山中有劉京叔麻信之諸賢題詠

五峯山在州東三十里高四里盤踞十三里西連恒山  
五峯如削中有三洞

柏山在州東南十里高一里盤踞五里西連恒山東有  
惠嶺有黑龍池山多柏劉祁記黑龍池雲興即雨邑  
人以為雨徵

遠望峪在州東南十里飛雲輒雨雨後漢雲似綃峪中  
有水

鎗鋒嶺在州東南五十里高五里盤踞十六里南連孫

贛山北連恒山嘔夷河經流山麓

孫贛山在州東南六十里高三里盤踞九里北連鎗鋒  
嶺東有孫贛寨西有龐涓寨相去數里麓南有千佛  
洞胥鑿石而成

玉華峯在州南十里雙峯似削玉高二里盤踞六里南  
連恒山北連翠屏山

柏梯在州城南 朱弁記柏梯凌峙于南山之北南山  
層巒疊嶂林木深蔚而香爐峯孤起屹立此柏梯之

奇觀也

玉泉山在龍山東北五里高半里盤踞三里有玉泉水  
瑩潔似玉泉出石罅環玉泉寺所謂玉泉寒溜也西  
有望景臺諸峯羅列川口原野分畫條列桑乾環繞  
如玦金麻草有遊山記劉祁歸潛堂記鄉帥高侯為  
築臺以居所居蓋其故宅之北四面皆見山若南山  
西巖吾祖舊遊東為柏山代北名剎西則玉泉龍山  
之西勝處故朝嵐夕靄千態萬狀其雲烟吞吐變化

牕戶間門前流水數枝每靜夜微風有聲琅琅使人

神清不寐

劉原叔記于玉泉山後以歸潛堂門前流水乃玉泉之分支也

橫山在州西二十里南北橫亘如城故崞縣在其左高  
一里盤踞五里

鳳凰山在州西北七里高二里盤踞五里神谿水發源  
山麓明司務孫聰建鳳山書院於麓闢鳳鳴亭翠  
微樓得月軒秋香圃藏書窟鼓琴洞奕棋臺釣魚  
磯碧水竇彩雲巖金魚塘瑞蓮池號為佳勝

畫錦山在州西北二十二里高二里盤踞六里以元工部尚書孫公亮予告歸爰名山焉 吳伯興評畧八山旋而環繞是馬鞍龍角在八山外也

馬鞍山連畫錦山形似鞍

龍角山在州北二十里高三里盤踞七里雙峯竦峙似龍角

暄谷

涖水在州南七里源出翠屏山東南山麓東南合溫泉

入靈丘縣界出倒馬關注唐河至河間為鏡河玉帶  
河 山海經高氏之山滙水出焉東流注於河 漢  
志代郡靈丘縣滙河東至文安入大河過郡五行九  
百四十里并州川 水經注滙水即溫夷之水也出  
縣西北高氏山山海經曰高氏之山滙水出焉東流  
經於河者也其水東南流又南逕曰候候塘川名也  
又東合溫泉水又東泉水注之水導源莎泉南流水  
側有莎泉亭東南入於滙水又東逕靈丘縣故城南

元和志蔚州靈丘縣溫夷水一名涇水出縣西北  
高氏山 涇水一名唐河西去唐縣百五十步 通  
典衛水在今常山郡靈壽縣西山所出 舜以冀州  
南北濶大分衛水為并州 涇水源發恒山東北流  
至定州境會唐水南入於衛 唐水自定州南宋村  
白龍泉東流而下合涇水以有清濁之分故亦名清  
水河 薛士龍曰恒水東流合涇水至瀛州高陽縣  
入易水 水經注云涇水東過上曲陽縣北恒水從



西來注之自下滌水兼納恒川之通稱即禹貢所謂恒衛既從也

嘔夷河在州東南五十里源出鎔鋒嶺東南流至金峯石溝堂山水自西北來匯流經靈丘廣昌倒馬關定州界注於衛河又名唐河 周禮職方氏并州川曰潏沱嘔夷顏師古註嘔夷出平舒 唐河三源翠屏山滌水鎔鋒嶺東嘔夷河陽頭鋪溫泉匯為滌水經唐山縣又為滌河水經注即溫夷之水是滌水嘔夷

河溫泉并稱矣無庸析作二水繇鎗鋒至金峯石溝  
堂山之水自西北來合流 太平寰宇記出靈丘縣  
西北高氏山周職方曰并州川曰嘔夷謂此翠屏山  
古名高氏山鎗鋒翠屏實連山也尹九宮曰嘔夷源  
靈丘西北謂出蔚高氏山下者非

亂嶺關水在州東四十里西流至新莊西南流

遠望峪水在州東南十里出峪即伏至顧冊村匯澤西  
流

溫泉在州東南百里湯頭鋪水似湯沫浴愈疾 水經  
注溫泉出西北暄谷其水溫熱若湯能愈百疾故世  
謂之溫泉焉東南流逕興豆亭北亭在南源上欽傾  
而不正故世以欽城目之東流注於澠水 後魏天  
賜末鄴行臺賈彞請詣溫湯療病 魏興光元年十  
二月至靈丘駐溫泉宮 魏顯祖即位司徒平原王  
陸麗自湯泉入朝乙渾殺之 太和二年二月丁亥  
行幸代之溫泉三年二月辛巳上奉文明后幸代郡

溫泉 魏出帝時楊遵彥取急就雁門溫湯療疾棄  
衣冠於水濱若自沉者變易名姓自稱劉士安入高  
山又東入田橫島以講誦為業海隅謂之劉先生

磁窯峽水在州南十里東西分流

渾源河在州西南十里出漢土峪分流繞城西北西流  
匯為大澤又西流匯神溪水曲折而西北至應州龍  
首山又折而北入秦乾

李峪水在州西南十里西流

凌雲口水在州西南三十里北流

玉泉出玉泉山瑩潔似玉繇石罅環繞古寺

黑龍池在州西秀嶺下雲氣升不三日而雨

乳泉在州西

西神谿水一名乳泉水在州西二十里橫山嘴側南流  
神谿水在州西北七里中有孤石方畝高丈餘上有律

呂神祠周環泉水歛出旁有煖水胥西南流一名神

德湖遼應歷三年三月庚寅如應州擊鞠庚子觀漁

於神德湖

崞川水源出州東北二十里流經州西南十五里古崞  
縣麻家莊 雲中志州西南源出應州西安鎮折而  
北注於桑乾河 後魏太平真君五年九月上自河  
西至馬邑觀於崞川 八水合而渾流故名渾河  
水經注濕水又東流四十九里東逕巨魏亭北又東  
崞川注之水南出崞山縣故城南王莽之崞張也縣  
南面元岳有背崞山處三山之中故以崞張為名矣

其水又西出山謂之亭口北流逕繁峙縣故城東王莽之當要也又北逕巨魏亭又北逕劇陽縣故城西王莽之善陽也按十三州志曰在陰館縣東北百三  
里其水又東注於濕水

### 靈丘縣

太白山在縣南二十里高極雲表為邑諸山之最石磴  
十八盤綿亘數十里一山屏列鳥道狹天又名太白  
鬼山有鍾乳穴穴中乳滴如懸穗徑多叢木茂草

巔產黃花蕨菜尤美虎狼錯跡樵採殊艱初夏積霰  
古冰厚數尺而巔殊平雲翳時見樓閣空濛杳幻山  
陽地亦廣衍山脉自雁門東北亂山橫迤繇山陰  
應州至渾源起北嶽南入平刑關突兀聚五臺東繇  
靈丘太白隘門諸山騰躍入紫荆倒馬此燕雲分境  
壤接山連之大勢也靈丘南有山高四百餘丈魏  
和平二年三月高宗過之詔從官仰射山峯無能踰  
者高宗一發出山三十餘丈過山南二百二十步遂



刊石勒銘合之覺山諸遺蹟當屬太白 高祖自洛  
北巡至高宗射銘之所停駕詔諸弟及侍臣皆試射  
遠近惟北海王詳箭不及高宗箭所十餘步高祖嘉  
之拊掌欣笑遂詔勒銘親自為制 遼太平二年三  
月遼寇白山裂有泉湧出 明萬厯時中使採礦民  
騷苦不堪時亟震推驗者謂地脉泄裂所致後以入  
不償出罷之 山產紅土可印印章 何士震詩興  
豆亭前看山色太白平臨巔律削

覺山在縣東南三十里由隘門山峽入取道巖石間路  
裁容騎右壁峭插干霄左絕澗數百丈下有怒湍晴  
雷起足下覺山井四山環井深可三百尺邑志稱  
塔井三奇又有懸鐘巖舍利洞覺山寺後魏孝文帝  
建以報母恩招集禪衲五百餘衆仍勅六宮侍女長  
年持月六齋其精進內典者並度為尼孝文帝母獻  
文思后李氏中山安喜人南郡王惠之女也葬金陵  
配饗太廟遼碑記元魏太和七年二月二十八日

孝文思答母恩於靈丘邑之東南溪行逶迤二十里

有山曰覺山巖壑幽勝闢寺一區賜額曰覺山寺重

熙七年五月二十五日記

此即御射臺諸蹟遺事  
失傳但以佛刹概之山

空月明巖際嘗聞棋子剝啄聲或笑語至夜分不息

土人以為飛仙往來也

孤山在縣東十八里平野孤峙不接他山

鎗嶽嶺在縣東二十里直上千仞多野芍藥黃白色尤

繁一叢十數本蜂聲不輟

三山在縣東二十五里平峯三 三山堡踞其前地多  
渠壑路繁雜突入者不易辨

遺釵嶺在縣東二十五里廣昌界一名銀釵 高山旁  
立嶺陡路曲相傳姐已過此墮釵故名 金大定五  
年六月至銀山獵

隘門山在縣東南二十里 水經注滏水自縣南流入  
峽謂之隘門設隘於峽以譏禁行旅歷山南高峯隱  
天深溪埒谷其水沿澗西轉逕御射臺南臺在北阜

上臺南有御射石碑南則秀嶂分霄層崖刺天積石  
之峻壁立直上車駕沿革每出斯游藝焉 宋起鳳  
游覺山記將次隘門峪口河聲澎湃激湍飛雪兩山  
虎踞不相下惟中容澗道數丈順水勢飛渡水逼仄  
急於就下為峯崖所束排扼逆轉騰躍豎起轟然奔  
奪而入水不遜石石又中砥遂覺深谷中彭彭若鉦  
鼓甲兵聲衆山皆響行水石間里許漸及巖路路且  
狹下臨無際峯頭一二塞垣石子纍纍從人謂胥楊

延朗守三關時遺址

鐵冠巖在覺山邃谷層坂湍激泉飛崇巖峻杳流雲丹  
冉號鐵冠巖云

烟燠巖在縣南四十里樹木盲黑濃如墨漬石作火燼  
色

柏巖在縣南四十里巖上有光相傳為佛珠後被竊巖  
遂晦云

鷺毛嶺在縣南七十里

野窩嶺在縣西南三十里鐵嶺口道多虎

枚迴嶺在縣西南蔚州古志高氏山在西北七十里滋  
水出焉東三十八里有枚迴嶺山麓相接

鼓子山在縣西三十里平地突岬似石鼓

黑龍谷在縣西四十里下為黑龍河

流石山在縣西五十里石理斧劈

紅山在縣西六十里山石赭色

花山在縣西北十二里花茂如錯繡

聖水山在縣西北三十里上有聖水泉濺珠舞雪禱雨  
輒應

漫山在縣西北七十里山勢紆徐旋折

團山在縣北二十二里形似覆釜無草木山麓設郵遞  
頗為孔路

黑山在縣北三十二里山石煤黛色

駱駝山在縣東北十五里兩峯似駝背

崿道山在縣東北二十里一名惡道崎嶇險峻行旅苦



之

龍泉山在縣東北三十里下有泉龍泉水鐘猶元次

山之水樂也李渤石鐘山記南聲函壺北音清越殆

可參繹後有西域人鎚巖下石泉遂輟響云

古志謂聖水山

即龍泉山而邑志分西北東北云

鄧峯山山以鄧隱峯名兩峯皆松翠浮霧縠所謂鄧峯

烟嵐也

滄水繇渾源州東南流入縣界又東南流入倒馬關

渾源志沁水在渾源城南七里出翠屏山東南流合  
溫泉入靈邱界注塘河

落水河在縣東十五里漲水轉石雨霽猶故道也

豐水在縣東南孤山湧泉東流為葫蘆河上有豐水神  
祠

馱水在縣南十里相傳僧畜驢馱桶下山鄉人酌水注  
之自馱而去故名

馬跑泉在縣南九十里北注塘河土人傳楊延朗跡

滋水在縣西南五里收迴嶺懸流五丈湍激之聲震動山谷東流入澹河

黑龍河源出縣西四十里黑龍谷南入澹河上建黑龍池廟

白龍池在縣西北三十餘里祈雨多應

白馬泉在縣西北四十里相傳漢文帝為代王時經此乏水騶從罷困帝禱之有馬跑地得泉

甘泉相傳在縣治內

廣靈縣

飛鳳山在縣東二十里一岡突兀下有西馬莊元侍郎  
龐清居此清嘗任洗馬今訛洗為西

壺山在縣東南一里几峙一山環山皆泉如萬斛珠璣  
隨地湧出匯為沼廣數畝植柳環之

加斗山一名神峯山在縣東南二十里峯巒峭立內有  
石孔似門明建寨其上名鐵裏腰封寨上又有圮城  
蹟存山下加斗村乃元總管聶諒故里也

過逢山在縣南一里上有仙人足跡

直峪山在縣南十五里即直峪口下有小河注壺流水  
留老山在縣南十五里羣峯似戟接加斗山山下乃袁  
表故里

榆杏山在縣南二十里石泉懸崖兩崖松翳所謂聖泉  
松風也

天井山在縣西南二十里有天井寺故址寺有井深五  
六尺雖旱不竭舊嘗引水入香積廚

林管山在縣西南四十里上有勒漢砦下有石家泉入壺流河 雲中志即臨灌山

社臺山在西關內石岡似臺

鞍子山在縣西三里山有二阜

石梯嶺在縣西二十里石磴陡絕

黃龍山在縣西二十里

林關山在縣西四十里

斷駕嶺在縣西四十里嶺左俗傳有竇建德墓

白羊山在縣西五十里停雲閣霧離竒窈幻昔有白羊  
寺下有小河注壺流河

馬蹄嶺在縣西五十里石上有馬蹄跡

迴嶺山在縣西五十里渾源孔道下有牛口峪俗傳竇  
建德返乘

望狐山在縣西六十里土人傳有神語人曰予近居此  
語訖人望見引狐入山故名

六稜山在縣西七十里山勢雄峻為廣靈冠前後各垂

三脊 尹九宮記蔚北山名襄始脉應州而盡於蔚  
城東耕嘗躡屐登之循跡而西至廣靈之六稜所經  
多廢城址與塹劇之跡又其東盡也為小關村亦有  
廢城址而屬之茲水河踰河復有址而屬之東北柏  
山

千福山在縣西北五里一名千夫山相傳前代遣千人  
取花斑石先禱神祠今鄉民多祈福於祠

九層山在縣西北二十五里上有九層崖

產花斑石



火燒嶺在縣西北六十里

卧龍岡在縣北八里東向對龍伏巖山似二龍然

巧八山在縣北二十里一山居中四圍七山相向東南

袞十五里有滴水崖泉脉自穴中出滴水成池

大山一名平頂山在縣北三十里平頂以象形名

牛欄塢山在縣北三十里周廻有石欄杆

老山在縣東北三里山胥石間有草生

瓦房山在縣東北四十里形似瓦屋

樺山在縣東北四十里產樺上有三岔砦

澧水 明一統志在縣東南平原山麓泉湧出上建

豐水神祠東流為葫蘆河以其水上狹下廣似葫蘆  
故名東流入定安縣西界一作豐水

壺流河在南關外發源縣西三十里莎泉東合壺川山  
下水二水匯流其形似壺經蔚州城北注順聖川流  
入桑乾河上狹下濶 古地理志祁夷水出平舒縣  
北至桑乾入濕今壺流河勢近之

神泉即壺川山下水也

枕頭河在縣南三里源出翟家疇東注壺流河

集興疇池在縣南五里東注壺流河水殊清湛冬夏不

竭

聖泉在榆杏山石泉臨澗飛瀑懸崖

雅兒匯在縣西南四里暑月有冰

灑雨泉在縣西南二十里直峪山源出石罅天旱使數

婦潑灑之遂雨北注枕頭河東入壺流河

作噓河波池在縣西十三里西山麓汪洋數里東入壺  
河池方十畝其水潛縮中約五畝天將雨雪則水輒  
湧漲後寢涸

莎泉在縣西三十里廣一畝沸騰汹涌即壺河源一  
說滋水源出莎泉東注合壺川下水名神泉二水  
合流其形如壺雲中志滋水有二一在蔚州西南  
三十里南馬莊一名神水泉東北入壺流河一在靈  
丘縣西南枚迴嶺懸流五丈湍激之聲震動山谷東

流水經注滋水導源莎泉南流水側有莎泉亭東南入於滌水又東逕靈丘縣故城南今莎泉水不入滌地勢似別魏太延二年八月丁亥詔廣平公張黎發定州七郡一萬二千人通莎泉道

瑞泉在縣西五十里白羊山泉瀑奔騰如唾玉

一斗泉在縣西北三十里九層崖水裁一斗可給百戶滴水巖泉在縣北十五里山半懸數丈由石隙注潭潭周盈丈深尺不竭不溢禱雨多應

壺泉 平原突出一石峯獅口噴泉一泓味甘東旋為  
小池似半規新月

廣昌縣

孤山在縣東二十五里平地突出

湖山石在縣東三十里一名太虎石

浮圖峪在縣東三十里

鐵嶺在縣東三十里嶺上石象鐵

雕窩崖在縣東六十里古有銀洞所謂銀坊道也後塞

牛心山在縣東南五里巔有巨石似牛心

鼻子嶺在縣南二十里白石山左險峻高脊似鼻

白石山在縣南二十五里山多白石上有雲臺 朝陽

洞碾磨水泉胥具棲隱地也 雲中志有白石谷路

### 通唐縣

挿箭嶺在縣南三十里

祭刀嶺在縣南四十里

烟薰嶺在縣南五十里崖多烟痕

神仙山在縣南一百十里遞高四十里接唐縣境一名尖山相傳仙人對奕於此

涑山在縣西南三里一名旗山相傳宋將楊景暨旗於此七峯相連一名七山拒馬河源此

登梯山在縣西南三十里內有石磴木棧翠崖瀑布一名登梯嶺以石級直上似梯也

香山在縣西十里卉木競芳上有香山古寺巔有龜龍虎象石



玉皇山在縣西十里

驛馬嶺在縣西四十五里

雕窰崖在縣西六十里古有銅洞後塞 廣昌舊置爐

鑄錢名銅山治唐至德以後廢元和間復鑄後又廢  
九層巖在縣西北三十里

石門峪在縣西北

聚雲山在縣北十三里

黑石嶺在縣北五十五里山多黑石

北口峪在縣北七十里峪中無村落

野狐山在縣東北十里狐常夜鳴

獅子崖在縣東北二十里有石獅一名獅子峪

栗山五朝志飛狐縣有栗山拒馬河

拒馬河發源縣南半里七山下少東合涑水 水經拒

馬河出代郡廣昌縣涑山 水經注即涑水也有二

源俱發涑山東逕廣昌縣故城南王莽之廣屏魏封

樂進為侯國矣 東漢桑欽水經書拒馬河則楊六

郎在此拒戰金章宗馬跑河之說胥為無稽 漢志  
注廣昌涑水東南至容城入河過郡三行五百里并  
州浸莽曰廣屏師古曰涑音來 唐蔚州三河治距  
飛狐故監二十里而近河東節度使王鐔置鑪距  
馬河水鑄錢工費尤省以刺史李聽為使以五鑪鑄  
每鑪月鑄錢三十萬自是河東鑄錢皆廢 顏師古  
註涑出廣昌

涑源泉在縣東半里又東合拒馬河

涑水發源縣東一里北崖古塔下合七山水為拒馬河  
東流經紫荆關入易州涑水縣界一源發關內東南  
隅亦名涑水繇關堡水竇流入拒馬河 周禮職方  
氏正北曰并州其山鎮曰恒山其浸曰涑易 通典  
涑水在今安邊郡飛狐縣界

同通考

烏龍溝在縣東九十里

木瓜澗在縣東南四十里唐乾寧四年九月李克用擊  
劉仁恭仁恭遣單可及逆戰楊師侃伏兵於木瓜澗

克用方飲酒不為備是日大霧不覺伏兵及戰伏發  
克用大敗

搏虎澗在縣南五里相傳李存孝擲虎地

滌水一名湯河在縣南六十里源出渾源州南湯頭鋪  
東南流經靈丘又東南入縣境東流經直隸唐縣界  
入倒馬關又名唐河水勢昔盛居民結筏以渡後  
多淤洶成水田水經注滌水東逕嘉牙川川有一  
水南來注之水出恒山北麓雖川三合逕嘉牙亭東

而北流注於滉水水之北山即廣昌縣界滉水又東  
逕倒馬關關山險隘是為深峭詩人高崑之病良馬  
傳險之行故關受其名焉關水出西南長溪下東北  
歷關注滉水水南山上起御坐於松園建祇洹於東  
圃東北二面岫嶂高深霞峯隱日水望澄明淵無潛  
甲行李所逕鮮不徘徊忘返矣

馬跑泉在縣西南七十里相傳楊六郎屯兵馬蹄跑水  
生魚活軍百日今北山石上有楊六郎題福勝地三

硃字雨淋不湮磨云

一斗泉在縣西北三十里九層崖

聖母泉 杜昌詩碧淺映遠山潨洄繞市肆

瀝靈泉

陽高縣

白登山在縣東南二十五里白登村南二十里乃白登縣遺址有大白登小白登 雲郡諸山多源於陽高之白登山又至伏鹿而西為陽高之斷頭山邈迤而

南為採掠諸山 盤崖雄於西城源於陽和之白登  
白登村名在陽和南或曰魏廣鹿苑遷白登之民  
於此故名 金志白登縣本名長清大定七年更名  
有白登臺採掠山 括地志平城東北三十里有白  
登山白登臺在焉 通典雲中有白登單于臺漢武  
自將待邊處 梁元帝橫吹曲朝跋青陂道暮上白  
登臺 後魏延昌三年秋恒州上言白登山有銀鑛八  
石得銀七兩錫三百餘斤其色潔白有踰上品詔置



銀冶常令採鑄

虎頭山在縣東

西坦坡在縣東南

乳頭山 胡成嶺 南沙嶺 北沙嶺 羅家嶺胥在

縣西

雕窩崖在縣西十五里山半有石盆津漉滙焉崖遍開  
黃花土人名金蓮花麓有青龍觀崖下東為石窰溝  
西為大水溝

虎兒山在縣西二十里

龍混山一名偏梁寨在縣西五十里山勢嵯峨石壁峭立援鐵絙而上有石佛洞

採掠山在縣西八十里接大同界一名石會山魏明元帝大閼東郊講武以奚斤行左丞相大蒐於石會山斷頭山在縣西北十里大同府治介於斷頭馬頭二山之間三關志斷頭山在陽和邊境外明洪武五年七月諸將北征指揮張存道從中山侯陽和守合

墩不刺營至斷頭山或勸存道移軍不從遇寇力戰  
死之

雲門山在縣北十里邊牆外即府志翠屏山青陂山也

唐地理志雲州有青陂道為出兵路 遼志長青

縣有青坡山 雲中志翠屏當面如幃抱城 明高

陽孫文忠承宗嘗授經邊郡游飛狐拒馬間直走白

登又從紇干青坡故道南下結老將戍卒訪問要害

阨塞用是曉暢邊事

清涼山在縣北十五里邊牆外巔為神谷有穴名風洞  
邃不可測中似有風

堡子灣在清涼山南崖

樞密寨西山迤南峯巒突岨有青龍觀觀前有懸石巔  
有石洞援鐵絙而上西峯尤高名樞密寨

西巖在斷頭山南有積雪為開山口虎峪之巔劈峽間  
四月有殘雪開山口一名墨谷口金宗慶元年元  
帥左都監鄂屯襄救西京至墨谷口一軍盡殪襄僅

以身免

樞風崖西對西巖

猴兒山在虎兒山東守口河自兩山間出

虎耳山 龍門山 草塚山 天門山 盤道山 分

水嶺

桑乾河繇大同縣界東流入縣南川至馬營堡入天鎮  
縣界又東入直隸西寧縣境

十里河自邊牆外繇守口堡之開山口入逶迤繞城而

東折而東南入白登河

白登河在縣南二十里發源大同縣河兒頭村東流經縣南境至蕭家屯會十里河又東北流入天鎮縣十

里河

龍泉在縣南四十里石洞連龕水自西潞繞焉

馬邑河雲中志從西北山鑿石引出城北東流萬錦灘園圃皆資灌溉焉

青龍惠水匯為石窰溝大水溝

西山麓洞 水由山後鑿洞成渠

天鎮縣

枳兒嶺在縣東三十里

蕭牆山在縣東四十里山有黑龍背建寺有黑龍泉

盆山在縣東南八里一名盤山石巘參差名石蓮中峯  
大石峭立百丈有奇中通一罅泉瀉澗底泉西有石  
坪土人傳三仙奕此樵子馮氏見之至今石上留足  
跡云巖上又有仙人掌

秀峯山在縣東南十五里有天寧寺

玉泉山在縣東南三十五里瀑布三胥高十丈中瀑彌

盛

神頭山在縣東南五十里一名浮雲山一名伸頭山一名筆山有蟠龍卧虎二峯高插雲霄東南直接懷仁縣界上有吕仙洞最幽邃純陽時遊此山側有鐫繇此登巔可望雁門一名小天門

晚霞山在縣東南日落後山中有霞形似蓮花一名蓮



花山山中人又謂夜半有霞云

樺林坡在縣東南接玉泉山

武家山在縣東南

上陰山在縣東南有天落石

下陰山在縣東南

惟臺嶺在東陽河界 元世祖時納延平阿實克布哈言  
大同興和兩郡當車駕所經有惟臺嶺者數十里無  
居民詔有司作室嶺中徙邑民百戶居之割境內實保

齊牧地使耕種以自養從之阿實克布哈卽竿戶領  
實保齊上復欲盡徙興和桃山數十村之民以其地  
為實保齊牧地阿實克布哈固請存三千戶以給鷹食  
上皆聽納民德之至今飲食必祭

沙梁坡在縣南十里

人頭山在縣南三十里蔚州北百二十里以形似名

米新關山在縣南

小盤道山在縣南

風神山在縣西南二十里孤峙周數里色似堆藍一名孤峯山上有風神廟大風祈廟輒息

牛山在縣西南五十里有石洞三清溪環繞兩峯中有龍泉

平頂山在縣西南六十里

青雲山在縣西南百里有驚峯寺寺有石鼓與西寧盤崖寺石雞廣靈狗窩洞石狗齊鳴西有黑龍洞石乳滴水下有石盆承之歲旱取水輒雨

火燒嶺在縣西南百十三里

五架山在縣西南

石梯山在縣西南

環翠山在縣北二十里袤亘四十餘里白羊口榆林口

胥山南麓也

二郎山附環翠山有甘泉不涸不盈雲生即雨旱禱輒應

福祿山在縣東北八里相傳山伏白鹿名伏鹿山雲至

此必斷一名斷雲山 伏鹿山而西為陽和之斷頭  
山更西為鎮城之方山南垂為採掠白登山歷右玉  
馬頭丫角以入偏頭而漸達於牛灣黃河

桑乾河繇陽高東流入縣馬營堡境經大石堡樓子屯  
東西太保村至小鹽廠入直隸西寧縣白家泉界  
河在順聖西城南二十里東南入蘆溝河

海子泉在城內沍寒不冰炎夏彌寒汲飲恒足

十里河一脉自陽高後口入一脉自大同縣橋頭村滙

於陽高之蕭家屯東流入縣境經十里鋪七里墩縣西北轉城東北過李家莊至永嘉堡入直隸懷安縣李信屯界

黑龍泉在蕭牆山祈雨多應

溫泉在城東南三里屯北晨似蒸霧

湧泉在城西南一里俗名海子萬人用之不竭終歲不用不溢

七股泉在湧泉南有暢流勢

冰泉在城西南孫家園

八里井在縣西南八里屯水輕甘第一

沙河在縣西南十五里筆峯五架石梯三山水發源米  
薪關歷季沙河至宋家廠

天潮河發源城西南楊家屯清而味甘滙七股泉繇城  
西八十里河

龍泉在牛山兩峯夾峙清澈可鑑常有物蜿蜒其中  
玉泉在城北鄧家園水瑩似玉祈雨多取之

甘泉在二郎山

五泉河發源溫小堡定安營興隆堡龍池堡顧家營五泉至鹹水皂合流而下經陽高坦坡村大同康石莊復入縣境嘴兒頭入秦乾

李兒溝張仲溝胥在邊垣下

山西通志卷二十一